

欽定大清會典事例

欽定大清會典事例卷一百五十五

戶部

戶口

壯丁別寓 給印票執照 分析戶丁
漢軍改歸民籍及外省居住

壯丁別寓○雍正十三年議准八旗正身壯丁或寄寓親友或流落鄉屯向未入冊者補入本旗丁冊內勒限六月首報若從前潛住

盛京多年者即入於

盛京冊內約束當差若不呈報該旗潛匿私住別處者照逃人例治罪該管參領佐領並不行文地方官查究者照例議處若從前並未居住

盛京。潛匿他省者。勒令一年內自首。押令歸旗。免其治罪。○乾隆二十三年

諭

陵寢地方。關係重大。向來駐守官員。所用人役。雇覓各隨其便。未經立法稽查。間有無藉之徒。一時竄入。甚非慎重肅清之道。嗣後

東西陵各官。凡雇用人役。先期將姓名住址。造具文冊。移知該地方官。就原籍查明來歷。確係守分鄉民。方許入冊赴役。在平時召募詳慎。自可互相約束。儻有一二滋事犯案者。亦無難即時弋獲。庶彼此不得因

循○又奏准○

東西陵駐守大員。及各項當差人等。凡雇用人役。應將所雇之人。姓名年貌住址。造具冊結。由各該衙門。移知該州。查明實係守分良民。准受雇赴役。即由該州。造具印冊三本。一存本州。一送總理衙門。一送總兵官。以憑互相約束。遇有事故。開除。令各雇主。隨時報明該管衙門。於月底移州。並分報總理及該鎮一體。於冊內註銷。儻有來歷不明。及曾經過犯。經該州駁回。仍行私自容留。以及並未造具文結。私行雇用者。雇主係官。

照例參處。係兵役責革。又

東西陵所用樹夫草夫更夫埽院夫及各衙門隸役。向係行文地方官募送。近年以來該管官利其身工稍賤。多係自行雇覓。並不關會地方官。游手無賴之徒。遂多竄入。應令將此項人役造冊移送地方官。逐一查明。實係良民。准其應役。其素不安分者。即行斥逐。更換以後。缺出應補。各衙門移知地方官募送。不得私行收用。○二十八年

諭定例。另戶滿洲蒙古逃走在。一月內自行投回者。交

該旗管束。拏獲者分別初次二次。鞭責枷號。交該旗管束。夫身為滿洲蒙古世僕。而至於逃走。必其素行卑鄙。或債負逼迫所致。伊等現食錢糧。尚且逃走。若革去錢糧。豈復能安分靜守耶。即交與該都統大臣等。亦難管轄。不過仍然逃走耳。與其令伊等既回復逃。莫若賞給錢糧。派往伊犁當差。著交八旗都統等。將乾隆十八年定例以後。另戶滿洲蒙古。逃走在一個月以內。自行投回及拏獲者。俱行查明。連家屬一併派往伊犁。賞給步甲錢糧。當差行走。如賞給錢糧後。仍不悛改。復致逃走。此則匪劣性成。終身不能改悔。

者。竟不必派人查拏。即拏獲亦不必照逃軍例。即行正法。著於滿洲蒙古檔冊。即將伊等名籍削除。任其所之。毋庸辦理。著為令。○四十一年議定。凡幼丁迷失時。年在十五歲以下。即於十五歲以下緝獲。投回者。免其治罪。給付本家收領。若迷失時。雖係十五歲以下幼丁。至十五歲以上。始行緝獲。投回者。仍照逃人例治罪。○四十四年奏准。

盛京旗人。並旗下家奴。攜帶眷口。在吉林地方種地。內除正身旗人。仍拏解本處。照例辦理。其盛京兵部工部內務府之壯丁。並王公宗室之家。

奴及旗下家奴入於吉林官莊耕種納糧當差。並飭該管官嚴加約束。毋許滋事。○又

諭盛京吉林均係國家根本之地。境壤毗連。盛京旗人潛往吉林種地謀生。本無關礙。並非逃旗可比。從前奏請解回治罪之處。所辦原屬過當。伊等皆滿洲世僕。盛京吉林有何區別。其正身旗人六戶。即著入於吉林當差。毋庸解回盛京辦理。○五十六年奏准。凡幼丁迷失時。不知其祖父姓名住址。後經認回。以及年在十五歲以下迷失。至年長自行投回者。均免其治罪。給付本家收領。○嘉慶元年議

准在京滿洲另戶旗人於逃走後甘心下賤受雇傭工不顧顏面者即削除旗檔發遣黑龍江等處嚴加管束毋庸派撥當差轉令得食餉養贍其逃後訊無受雇傭工甘心下賤情事仍依本律辦理○又議准旗人獲罪銷除旗檔發遣當差十年無過遇

赦釋回人犯仍歸本旗檔內嚴加管束如五年後安靜改悔該旗酌量止許以步甲鐵匠挑取不得挑取護軍馬甲其未經年滿挑差以前遇事概不准其領賞○四年奏准發往各省遣犯減等

回旗定例五年後准其挑補步甲鐵匠仍慮貧苦為匪八旗步甲缺多遇有缺出俱將旗下家奴挑補此項步甲准發遣回京人挑補伊等得餉後如再滋事即拏送刑部發往煙瘴地方永遠不准釋回○道光八年議准

盛京官莊所屬陳藩兩項壯丁如有逃走無論遠年近年一經投回拏獲仍照舊例分別辦理毋庸銷除旗檔○又議准

盛京內務府鑲黃正黃正白三旗所屬綫丁及各項旗丁如有逃走無論年限次數投回拏獲分

別治罪。仍不銷除旗檔。其一切行同無賴之類。仍遵照奏定章程。銷除旗檔。○九年奏准。由京旗移居。

盛京雙城堡屯居閒散。逃走後自行投回。交與該管等官。轉飭該閒散父兄。自行管束。毋庸銷除旗檔。如係逃走被獲者。該將軍按其情節輕重。酌擬報部辦理。○同治三年奏准。旗民生計維艱。聽往各省謀生。其已在該地方落業。編入該省旗籍者。准與該地方民人互相嫁娶。○八年奏准。吉林五常堡。各屬荒地。招佃開墾。內有滿

陽旗籍浮丁一千餘戶。報墾荒地。令其移歸吉林旗籍。○又奏准奉天各旗戶。前往巴彥蘇蘇地方報墾。就近分別編入該地方旗冊。

給印票執照。○雍正十三年定。凡八旗在京官員兵丁閒散另住戶下人等。均令該佐領給予印票。開明各年貌家口。以備街道步軍尉查驗。其在鄉屯之候選及革職官員閒散另住戶下人等。每戶給予執照。開明年貌住址生業。以備地方官查驗。各佐領所給印票。先送該參領挂號。押用鈐縫關防。每年於歲底封印後。呈送都

統備考。○乾隆四十一年議定。在京八旗滿洲蒙古漢軍官兵人等。各按內城本佐領分定地界居住。不許移居外城。違者係官議處。係兵責懲。仍勒令移入城內。若年老退官之人。於近京墳園間曠處。就便居住者。聽。○四十七年奏准。東三省人等。挑取善獵。調進京城。由彼處補放京員。及承襲京城之官。奉

特旨居住人等之子。或在原籍居住。或來京當差之處。仍各聽其便。如有假託認族看守墳塋等事。來京之處。永行禁止。○嘉慶元年議准。八旗兵

丁及拜唐阿閒散人等。如有告假前往各省以
及口外者。俱令稟明各該管官。係何事前往何
處。及告假限期。詳晰聲明存檔。給領印票。回日
繳銷。僅有告假逾限不回。及回而不交納原領
印票。或不領印票。私行前往。及領有印票。私往
別處者。俱照例分別懲治。○道光五年奏准。八
旗官員兵丁告假。及私行出京。均照舊例辦理
外。至閒散告假。無論前往何處。報明佐領。告知
參領註冊。由佐領給予圖記。即准外出營生。該
參領呈明都察院存案。年終彙咨戶兵二部。儻

參佐領有勒措情事。或經控告。或經查出。即行
叅處。其回京不必勒定限期。如在外有事逗遛。
報明地方官。行文該旗。回京之日。仍准挑差。儻
逾一年。並無地方官展限申報到京。即行銷除
旗檔。或在外滋事。即照民人例問擬。或投往親
族任所住所。挾詐需索。准外任各官。呈明上司
究辦。或在外年久。願改民籍。呈明地方官。准其
改入民籍。其私自出京者。以逃走論。至降革休
致官員。已退錢糧兵丁。未食錢糧之舉貢生監。
均照間散例。辦理。各省駐防同。○同治三年奏

准旗人有願出外營生者。無論降革休致文武
官員。及未食錢糧本食錢糧舉貢生監暨兵丁
閒散人等。准將願往省分。呈明該參佐領。出具
圖結。報明該都統。給予執照。填寫三代年貌家
口。蓋用印信。註明冊檔。隨時分咨戶兵二部。准
其出外營生。或一人前往。或攜眷前往。均聽其
便。僅該參佐領有勒情事。一經查出。或被告
發。即行叅處。其回京不必勒定限期。有願在外
落業者。即在該管州縣將原領執照。呈請詳繳。
由該省督撫分咨部旗。編為該地方旗籍。准其

與民人互相婚娶生子。隨時呈報該州縣轉詳督撫。年終由督撫彙報部旗存案。有願入民籍者。即編入該地方民籍。所有田土戶婚詞訟案件。統歸該地方官管理。有願改徙他省者。准其呈明該州縣詳請督撫給咨前往。其已編入該省旗籍。有不服水土。願仍回京旗者。准其呈明該州縣詳請督撫給咨回旗。到京仍准挑差。已入民籍者。不在此例。如有不安本分。滋生事端者。無論曾否入籍。准該州縣照民人一律懲治。其服官外省之降革休致文武各員。及病故人員之子孫。

親族人等。無力回京。願在該省落業者。亦准一體辦理。其未經告假私自出京者。仍照舊例。以逃走論。各省駐防同。

分析戶丁。○順治八年定。原在

盛京編審正戶人。有告稱是伊奴僕者。不准歸併。係戶籍內人。有告稱非伊家奴僕者。亦不准出戶。○雍正二年覆准。八旗開戶義子人等。不得越佐領認戶。仍留在本佐領下當差。如有越佐領認戶。自稱正身與原主無涉者。該旗都統。即擎交該部。從重治罪。○三年議准。旗下奴僕。或

籍別旗名色買贖。或自行贖身。旗民冊籍均無
姓氏者。查出即令歸旗。其有隨主出差外任。私
有蓄積。鑽營勢力。欺壓本主贖身者。自康熙五
十二年

恩詔以後。雖在民籍。究明欺壓是實。亦令歸旗。若果係
數輩出力之人。本主念其勤勞。情願聽其贖身
為民。旗部有案可稽。州縣有籍可據。為民者仍
歸民籍。舊主子孫不得藉端控告。○乾隆三年
議准。

盛京帶來奴僕。原屬滿洲蒙古。直省本無籍貫。帶

地投充人等。雖有籍貫。年遠難以稽考。均准開戶。不准放出為民。乾隆元年以前。白契所買。作為印契之人。令在本主佐領下。聽選步軍當差。俟三輩後。著有勞績。本主情願放出為民者。呈旗咨部。覈明冊籍。有伊祖父姓名籍貫者。准其為民。仍行文該管地方官註冊。止許耕作謀生。不准考試。○四年議准。

國初俘獲之人。年分已遠。與投荒之人。迷失籍貫者。無別。至遠年印契所買奴僕之中。有

盛京帶來帶地投充之人。原係旗人。轉相售賣。雖

有籍貫。亦無從稽考。均應開戶。不准為民。如內有實係民人印契賣與旗人。契內有籍貫可稽者。照乾隆元年以前白契所賣家人之例效力。過三輩後。准其為民。○又議准。乾隆元年以後。白契所買之人。因未入丁冊。是以准其交價贖身。與乾隆元年以前白契所買。作為印契者不同。應准其贖身為民。○又議准。八旗戶下家人開戶。向由各該旗聲明本主。念其世代出力。情願准其開戶者。該參佐領族長族人列名具保咨部。無論何項人等。覈明上次丁冊有名。並冊

內註係陳人者。即准開戶。至旗下家奴。放出為民。向由本主念其數輩出力。勤勞年久。情願放出。為民。呈報本旗咨部。轉行地方官。收入民籍。為民。今既將

盛京帶來奴僕及帶地投充人等。並乾隆元年以前。乾隆元年以後。白契所買之人。分別定例。應行各旗。將奴僕之祖父籍貫。令各主據實開報。畫押。參領佐領詳查。呈報都統送部。凡遇比丁之年。即照此次造冊。於編審內註明。遇有開戶。為民之案。以便稽考。○又議准。乾隆元年以前。

八旗奴僕。放出為民。有未經呈報旗部者。該旗查明果係數輩出力。其主情願放出。編入民籍。地方官有冊可據者。准其為民。其乾隆元年以前。放出為民。未入民籍。以及元年以後。始入民籍者。應令歸旗。作為原主戶下開戶壯丁。至於設法贖身之戶。或係自備身價。或親戚代為贖身。均應歸原主佐領下。作為開戶。若有實係買主用價契買後。又向買主交價贖身者。應歸買主佐領下。作為開戶。如係開戶壯丁。用價買出者。買主原非正身。其名下不便復有開戶之人。

應仍歸原主佐領下。作為開戶。○又議准。旗下家奴。將民人之子抱養。既經繼與家人為嗣。即與家人無異。應造入伊主戶下。以便稽查。○又議准。八旗正戶。從前撫養並隨母改適人等。或跟隨外任。或在鄉居住。未及呈報。因未造入丁冊。或因丁冊無名。不准自首者。總屬戶口不清之人。未便任其脫漏。令各旗查明。分析彙奏咨部。別載冊籍。如有正戶人之妻。因夫亡改嫁與正戶。及嫁與戶下家人者。其前夫所生之子。原係正身。應准其隨母改適。俟撫養成丁。仍歸本

宗。其子母情願依倚者。准其依倚。仍造入生父
本宗正冊。若民間子弟。自幼隨母改嫁與正戶
旗人者。照戶口不清例。別載冊籍。至戶下家人
之子。隨母嫁與正戶。以及民間之子。隨母改嫁
與戶下家人者。統以戶下造報。以後遇有隨母
改嫁人等。參領佐領確查報明。都統存案。仍於
編審之年。註明丁冊。咨部察覈。○又議准。從前
正戶旗人之子。自幼給予旗人正身。及戶下家
人撫養。呈請歸宗者。該旗覈實。取具兩姓族長
族人保結。並該參領佐領印結。送部存案。准其

歸宗。○又議准八旗造報丁冊內有向開正戶
一戶。後經造為開戶人等。或係隨母改適。或寄
入親屬戶內。原係別立一戶。迨後被人欺壓。造
入戶下。作為開戶。原非戶下家人可比。准其呈
旗查明。果有被人欺壓情弊。分析具奏。咨部更
正。至從前造入戶下。後經造為開戶。並向來造
為開戶人等。若果係正身。當時即應呈明更正。
何至數十年之後。以待子孫分別。此等停其更
正。以杜冒濫。○又議准八旗絕戶家奴。如本主
有同族人等。即編入族人戶下。無族人可歸。無

論家下陳人契買奴僕均准於本佐領下開戶。看守主墓年力壯者於本佐領下選充步軍內有乾隆元年以後白契所買之人准其贖身身價照絕戶財產入官例辦理。○十二年奏准旗人家奴有借名設法贖身私入民籍者除已經議結外以後或被首告或經查出其曾報部旗伊主得過身價者令歸旗入於原主名下作為開戶不准歸本佐領下其未經報部報旗者無論伊主曾否得受身價均令歸旗仍作為原主戶下家奴不准歸入佐領作為開戶。○二十一

年

諭八旗別載冊籍之人。原係開戶家奴。冒入正戶。後經自行首明。及旗人抱養民人為子者。至開戶家奴。則均係旗下世僕。因效力年久。其主願令其出戶。現在各旗及外省駐防內。似此者頗多。凡遇差使。必先儘正戶正身選用之後。方准將伊等選補。欲自行謀生。則又以身隸旗籍。不能自由。現今八旗戶口日繁。與其拘於成例。致生計日益艱窘。不若聽從其便。俾得各自為謀。著加恩將現今在京八旗在外駐防內。別載冊籍。以及養子開戶人等。皆准其出旗為民。其情

願入籍何處。各聽其便。所有本身田產。並許其帶往。此番辦理之後。隔數年候朕酌量降旨。此內不食錢糧者。即令出旗。其食錢糧之人。若一時遽行出旗。其生計不免拮据。應如何定以年限。裁汰出旗之處。交與該部會同八旗都統等。詳細定議具奏。欽此。遵

旨議定。凡別載冊籍養子開戶人等。在京署任各員。不准實授。文武官員。停其升轉。旗員俟員缺裁汰。其外任綠營員弁及文職等官。應即令出旗為民。所借宗人府並各旗滋生以及應扣各項銀。仍在伊等名下坐扣完結。儻有病故緣事者。所

借各項均准寬免。至現在捐納候選並閒散進士舉人生員繙譯進士舉人生員等亦即准其為民。並令各該旗詢明情願入籍何處。由該旗徑咨該地方官。收入民籍。仍造冊咨部存案。至現在食錢糧人等有願退糧為民者亦一例辦理。其餘現在當差人等停其調選。俟有缺裁汰。遇有婚喪事不准支給。

恩賞銀。其現在當差人丁內情願退糧為民並革退兵丁未完庫銀以及代扣庫銀亦一例豁免。有具呈告退現食半俸餉整俸餉及陣亡人等之

父母妻室。賞給半俸餉者。仍准其支食。病故裁汰。外省駐防官兵閒散內。別載冊籍。養子開戶人等。亦照此辦理。仍令各該將軍等。就近詢明願入何省民籍。造冊咨送該旗存儲。其典賣地並老園地。現今准其管業。如有典賣者。照乾隆七年之例。令其典賣與旗人。永不准典賣與漢人。至現在官兵內有認買官地官房。未經扣完。如願交現銀。准其交納。如無現銀交納。將房地交回戶部。扣過俸餉。將租息扣除。餘贖銀准其給還。○二十四年奏准。八旗內有本主得銀放

出潛入民籍者。照例治以不行呈報之罪外。仍令各歸民籍。其指借他人名色代為認買私自出旗。或帶地投充。將子孫改姓潛入民籍者。除照例治罪外。仍斷還原主。其鑽營勢力。欺壓幼孤。贖身為民者。除倍追身價。給還原主外。將人口賞給外省駐防將軍都統等為奴。○二十七年

諭。派出查旗王大臣等原奏八旗另記檔案之人。業經為民復行入旗。再養子並根源不清人等。校對部冊。分析辦理一案。原因鑲藍旗蒙古旗分之人。於乾隆

二十二年業經為民復行入旗緣由。所降諭旨甚明。今派出王大臣將自行出首並查出人等分別具奏。有乾隆二十二年查辦後復行入旗者。亦有二十二年以前未經查出者。伊等在限內查出及自行出首。施恩將二十二年查辦後復行入旗人等免其治罪。俱著為民。二十二年未經查出。今聞朕旨即於限內自行出首人等。甚屬可憫。若將伊等辦理則匿不自首人等反得倣幸。伊等豈不負屈。著施恩俱作為另戶。在原差上行走。再二十二年以來此次查辦尚有未經查出人等亦未可定。著照查旗王大臣所奏將

部旗冊檔詳細查對。如二十二年業經為民復行入旗者。再不寬恕。即照鑲藍旗蒙古所辦。發往伊犁。二十二年以前事件。業經年久。無可查對。俱施恩不究。作為另戶。即有首告之人。管旗王大臣毋庸辦理。管旗大臣參佐領。均有查辦之責。不時留心嚴查。再過幾年。仍派王大臣查辦。如此次查辦後。再有業經為民復行入旗。並抱養民人之子。撫養家人之子。必從重治罪外。該旗大臣參佐領等。一併治罪。斷不輕恕。將此轉行八旗遵照。此係例外施恩。以後不得妄冀。

○又奏准。民人之子。自幼隨母改嫁與另戶旗。

人者。該旗隨時存記。俟成丁後。取結報部。令其
為民。○又議准。八旗戶下人等。伊主情願放出
為民者。除本身不准居官考試外。其子孫各照
該籍民人例辦理。○四十一年議准。八旗絕戶
家奴。如無族主可歸者。該旗查明。如係遠年舊
僕。及乾隆元年以前契買奴僕。造冊送部。轉行
地方官。收入民籍。其乾隆元年以後契買奴僕。
令其贖身為民。身價銀兩。照絕戶財產例辦理。
○又議准。另戶旗人之子。如自幼給予另記檔
案。開戶戶下家奴。及民人撫養後。有指稱另戶。

復請歸宗者。概不准行。○四十二年

諭。向來滿漢官員人等家奴。在本主家服役三代。實在出力者。原有准其放出之例。此項人等。既經伊主放出。作為旗民正身。亦未便絕其上進之階。但須明立章程。於錄用之中。仍令有所限制。嗣後此等旗民家奴。合例後。經該家主放出者。滿洲則令該家主於本旗報明。咨部存案。漢人則令該家主於本籍地方官報明。咨部存案。經部覆准後。准其與平民一例。應考出仕。但京官不得至京堂。外官不得至三品。以示限制。著為令。○五十六年奏准。滿漢官員人等家奴。本

主情願放出為民者。由部覈覆。准入民籍後。仍不准即行考試出仕。俟入民籍後。所生子孫。始准與平民一例應考出仕。○又議准。八旗戶下家奴。如有鑽營勢力。欺壓孤幼。贖身為民者。倍追身價。給還原主。將人口賞給各省駐防兵丁為奴。○五十七年奉

旨。旗人行竊。除將該犯照例治罪外。其子孫俱著削去旗檔。為民著為例。並令曉諭八旗及各處駐防一體遵辦。○嘉慶六年奏准。凡旗人犯罪。例應刺字者。即銷除旗檔。照民人一例辦理。若旗人行竊。有情

同積匪及賊逾滿貫者。該犯子孫一併銷除旗檔。各令為民。○道光二年奏准。各王公所屬包衣人等。如有抱養過繼。不准出戶為民。○五年覆准。內務府官兵閒散人等。逃走失迷。與八旗官兵一律辦理。一月限內投回。仍准挑差。如逾限未回。及二次逃走者。俱即行銷檔。○又議准。銷除旗檔人等之妻。未便仍以旗人論。應一併銷檔。○又奏准。各王公屬下包衣官兵閒散人等。逃走。即由該旗都統行文查拏。俟拏獲之日。仍歸入王公貝勒屬下。嚴加管束。毋庸銷檔。○

又奏准旗人逃走。初次或實由病迷。仍准投回挑差。如逾限一月後。無論投回拏獲。及二次逃走者。均即行銷檔。官員有心逃走。一次即行革職銷檔。旗人登臺賣藝。寡廉鮮恥。有玷旗籍者。免其發遣治罪。連子孫一併銷檔。旗人及宗室恃勢窩娼窩賭。行使假票假銀。詎誦欺詐。扛訟誣告。以及賣賊行竊等類。該民人按例治罪。而旗人不顧行止。甘心串通為匪。亦屬有玷旗籍。應照民人上減一等治罪。並銷除旗檔。儻係旗人主使。無分首從。與民人同科。○六年議准旗

人初次犯竊。即銷除旗檔。其情同積匪。及賊逾
滿貫者。該子孫一併銷檔。各令為民。仍令各旗
於比丁之時。將三年限內銷檔人丁花名。造具
總冊送部比審。駐防省分一律辦理。○又覆准
八旗逃人之妻。照例銷檔。如有情願侍奉翁姑。
撫育子女。看守墳塋等情。各聽其便。○七年定。
銷除本身旗檔。逃走人之妻。如願侍奉翁姑。撫
養子女。准其附入翁姑子女家口檔內。無翁姑
子女者。如願依賴田廬。看守墳墓。准其附入族
人家口檔內。均不准請支養贍錢糧。病故後。視

其子孫分例請賞。無子孫者。不准援例請賞。○
又定。旗下婦女孀婦。逃走及病迷走失。一經查
實。無論投回。拏獲。雖經治罪。及免罪回旗後。該
旗均另記檔案。概不准援例請支養贍錢糧。身
故後。亦不准援例請賞。○八年

諭。向來發遣回城人犯。例給伯克回子為奴。近因漸積
漸多。回子難於管束。且各城印房等處。章京筆帖式。
役使乏人。嗣後發給回城為奴之犯。准其酌量撥給
印房各章京筆帖式等供役。該章京等卸任之時。列
入交代。不准攜回本旗。俟撥給各章京衙門足數役

使再分給大小伯克為奴。毋庸分給小回子。以免拖累。○十二年覆准。銷除本身旗檔逃人之妻。如無翁姑子女田廬產業。止贖隻身。情願看守祖塋。亦准附入族人家口檔內。照無依孤女例支食養贍錢糧。病故後。不准援例請賞。○十六年議准。旗人之女。不准嫁與民人為妻。儻有許字民人者。照例議罪。仍准其完配。將該旗女開除戶冊。○同治三年覆准。八旗滿蒙漢。及各省駐防人等。有聘定未婚女子。因夫故過門守貞者。該旗查明咨部收檔入戶。照例辦理。

漢軍改歸民籍及外省居住○乾隆七年

諭八旗漢軍自從龍定鼎以來國家休養生息戶口日繁其出仕當差者原有俸餉足資養贍第閒散人多生計未免窘迫又因限於成例外任人員既不能置產另居而閒散之人外任即有親友可依及手藝工作可以別去營生者皆為定例所拘不得前往以致袖手坐食困守一隅深堪軫念朕思漢軍其初本係漢人有從龍入關者有定鼎後投誠入旗者亦有緣罪入旗與夫三藩戶下歸入內務府王公府屬撥出者以及召募之暇手過繼之異姓並隨母因親等類

先後歸旗情節不一。其中惟從龍人員子孫皆係舊有功勳。閱世既久。自毋庸另議更張。其餘各項人等。或有廬墓產業在籍者。或有族黨姻屬在他省者。朕意欲稍為變通。以廣其謀生之路。如有願改入原籍者。准其與該處民人一例編入保甲。有不願改入原籍而外省可以居住者。不拘道路遠近。准其前往入籍居住。其有原籍並無依賴。外省亦難寄居。不願出旗。仍舊當差者。聽之。所有願改歸民籍。與願移居外省者。限一年內具呈本管官覈奏。如此。屏當原為漢軍人等。生齒日繁。籌久遠安全之計。出自特恩。後不

為例。此朕格外施仁原情體恤之意。並非逐令出旗為民。亦非國家糧餉有所不給。可令八旗漢軍都統等詳細曉諭。仍詢問伊等有無情願之處。具摺奏聞。

○八年

諭朕前因八旗漢軍戶口日繁。生計未免窘迫。又限於成例。不能出外營生。特降諭旨。除從龍人員子孫。毋庸更張外。其餘各項入旗人等。有願改歸民籍。與願移居外省者。准其具呈本管官覈奏。原指未經出仕及微末之員而言。至於服官既久。世受國恩之人。其本身及子弟。自不應呈請改籍。而朕亦不忍令其出

旗。此後文職自同知等官以上。武職自守備等官以上。不必改歸民籍。○十二年

諭。朕因八旗漢軍人等。生聚日繁。家計未裕。於乾隆七年。特頒諭旨。自從龍人員子孫外。願改歸民籍。移居外省者。准其具呈本管官具奏。旋據漢軍都統等分晰辦理。允行在案。朕觀漢軍人等。或祖父曾經外任。置立房產。或有親族在外。依倚資生。及以手藝潛往直隸各省居住者。頗自不少。而按之功令。究屬違例。伊等潛居於外。於心亦自不安。朕思與其違例潛居。孰若聽從其便。亦可各自謀生。嗣後八旗漢軍人等。

願在外省居住者。在京報明該旗。在外呈明督撫。不拘遠近。任其隨便散處。該督撫咨明該旗。每年彙奏一次。以便稽察。務令安靜營生。毋得強橫滋事。如此則於功令不相妨礙。伊等亦得安居樂業。生計有資矣。欽此遵。

旨議定。漢軍情願在外省居住者。在京報明該旗咨部。部咨各省。其在外呈明督撫者。亦一面咨明該旗。一面咨部。仍於每年底各省造冊送部彙總奏。

○二十六年議准。漢軍出旗為民。該管州縣查明

成丁者。各給鈐印手票。收執隨帶。以憑稽查。其
由京赴各省入籍者。該旗給予執照。沿途查驗。
至入籍地方。繳換手票。○二十七年奏准。出旗
為民人等。願入順天府籍者。該旗咨部之外。仍
造冊派員帶領為民人等家口。交送順天府。轉
送至伊等願入之州縣。編查收管。○又議准。八
旗漢軍從龍人員。如直省有可依倚者。任其隨
便散處。願為民者。亦聽改入民籍。○又議准。漢
軍人等。六品以下現任官。並一應候補候選告
休革退文武官。及兵丁閒散人等。有情願改入

民籍者。准其改入。在內呈明該旗。在外呈明所
在省分督撫。該旗該督撫覈實報部。統由該旗
造具家口清冊。由部轉行入籍省分州縣。收入
民籍。○又議准。漢軍請入民籍者。本支家口一
體改入。若有父願在旗。子願為民。子願在旗。父
願為民情事。概不准行。其京員自主事以上。旗
員自五品以上。外官自同知守備以上。均不准
改入民籍。○五十五年奏准。漢軍六品以下職
官。准其為民之例。即行停止。如有兵丁閒散人
等。情願改入民籍者。仍照舊例。准其為民。○嘉

慶十八年

諭八旗漢軍在屯居住者散處於直隸各州縣距京較遠該管佐領等例不准離城遠出勢難查察而該州縣官又以漢軍等身係旗人向不歸其管轄遂至此項旗人任其作姦犯科毫無約束不可不更定章程以專責成著直隸總督通飭該州縣嗣後屯居漢軍旗人一切戶婚田土事件俱歸所隸州縣一體管理若仍前諉卸遇有失察之案將該州縣官一例叅處並著八旗漢軍都統等傳知所屬屯居旗人嗣後均安靜守法聽該管州縣官約束設有抗違從重治罪

現在直隸省編查保甲。即令將屯居漢軍與民人一體編查。○又奏准屯居漢軍旗人戶婚田土事件俱歸所隸州縣管理一體編查保甲。其丁憂起復報考以及查報家口檔冊除先行報旗查辦外仍報明地方官由地方官呈報各旗覈對。

欽定大清會典事例卷一百五十六

戶部

戶口

旗人撫養嗣子 旗人買賣奴僕出
差官員駐防官兵買僕 口外買帶漢

人 打牲壯丁及黑龍江官兵買僕 竈戶
賣身 祭賣贖叛逆人犯 投充人口 出

征俘獲人口 違犯逃回

旗人撫養嗣子○

國初定旗人無嗣撫養他人之子。許報明本主貝勒該旗都統送部註冊。增入本佐領壯丁數內。若私自撫養者。斷回本宗。○順治十八年題准。凡無嗣人存日撫養兄弟族人之子。准承受家

產。其撫養他人及奴僕之子。不准承受。若存日
未曾立嗣。身故後。准近房承受。如本族無人。存
日保結撫養異姓之子。亦准承受。若無族人。又
無撫養異姓人。照絕戶家產例辦理。○康熙七
年覆准。凡撫養他人之子為嗣。歿後。其子本生
父母年老乏嗣。仍令歸宗。○又題准。凡無嗣人
家產。係兄弟之子承受。有親生女者。給家產三
分之一。若疏族人承受。其女給家產五分之一。
若撫養異姓之子承受。及應歸佐領撥給者。其
女均給家產之半。如數少難分。及有分撥餘賸。

者均給承受之人。凡分給女子。無論人數止於應給分內分撥。○雍正十二年議准。無嗣人請繼立異姓親屬為嗣者。務令該旗取兩性情願甘結。並各該管參領佐領及族長保結。送部存案。以杜占奪財產之端。如無兩姓甘結者。不准其所遺絕戶家產。照例辦理。○乾隆四年議准。八旗無嗣之人。如有同宗及遠近族人。昭穆相當可繼為嗣者。由該旗參領佐領呈報都統咨部。准其承繼。不得過繼異姓。以亂宗支。如無同宗及遠近族人。昭穆相當可繼為嗣者。除戶下

家奴民間子弟。雖與正戶旗人分屬至親。不准承繼外。其有正戶親屬情願過繼者。取兩姓族長。並該參領。佐領印結咨部。准其承繼。僅有同宗可繼。捏稱並無族人。混繼異姓者。按律治罪。○三十八年奉准。凡無子者。慎立後嗣。照依同宗昭穆次序承繼。其夭亡未婚之人。自當於同輩中。按照服制次序。仍為其父立繼。不必再為幼子立繼。若閭族中實無子姪同輩。可為其父立繼之人。亦止得為未婚之子立繼。或已娶而故。其婦未能孀守。若因其媳改適。忍令其子無

後殊於情理未協。且恐有謀占財產。唆強其婦改適者。亦未可定。況其子已經成立。自亦應為其子立嗣。若子已婚而故。其媳又能孀守者。並已聘未娶。其媳能以女身守志者。止應為其子議繼。不得再為其父立繼。又其子雖未聘娶。而因出兵陣亡。揆之勿殤之義。亦應為之立繼。以示體恤。若屬支內實無昭穆相當。可為其子立繼之人。亦應仍為其父立嗣。不得重複議繼。致滋訟端。○又議准駐防旗人繼嗣者。該將軍等飭取該本管官及該族甘結。分咨部旗。由旗查

明丁冊。該參領佐領族長。加具印甘各結咨部。准其過繼。○又議准旗人無嗣。許立同宗昭穆相當之姪承繼。先儘同父周親。次及五服之內。如俱無。方准擇立遠房及同姓為嗣。若繼子不得於所後之親。聽其告官別立。其或擇立賢能及所親愛者。於昭穆倫次不失。不許宗族指以次序告爭。如有貪圖財產。將獨子出繼與人。獨子貪得財產。不顧本生。或本生父母有子。所後之親無子而捨去。或實有同宗而繼異姓者。均按律治罪。若所養父母有子。所生父母無子。欲

還者聽。○四十年

諭立繼一事。專為承祧奉養。固當按照昭穆之序。亦宜順
孀婦之心。所以例載嗣子不得於所後之親。准其另
立。實準乎情理之宜也。至獨子雖宗支所繫。但或其
人已死。而其兄弟各有一子。豈忍視其無後。且現存
者尚可生育。而死者應予續延。即或弟兄俱已無存。
而以一人承兩房宗祀。亦未始非從權以合經。又或
死者有應襲之職。不幸無嗣。與其拘泥獨子之例。求
諸遠族。何如先儘弟兄之子。不問是否獨子。令其繼
襲之為愈乎。嗣後遇有孀婦應行立繼之事。除照例

按依昭穆倫次相當外。應聽孀婦擇其屬意之人。並問之本房是否願繼。取有合族甘結。即獨子亦准出繼。庶窮嫠得以母子相安。而立嗣亦不致以成例阻格。該部即照此辦理。著為令。○五十六年議准。旗人無子者。許立同宗昭穆相當之姪承繼。先儘同父周親。次及大功小功。總麻如俱無。方准擇立遠房及同姓。取具該參領佐領及伊族長族人。生父立名畫押印甘。各結送部。准其過繼。如有乞養異姓親屬及抱養民間子弟。戶下家奴子孫為嗣者。分別治罪。○又議准。旗人無子。如過

繼異姓旗人。民間子弟。尸下家奴。冒入錢糧者。除照律分別治罪外。其先後領過銀米。照數著追。儘本犯力不能完。由該旗查明。歷任參領佐領。各按在任月日分賠。批解戶部歸款。仍將失察各官。交部議處。○又奏准。額魯特閒散內。查有土爾扈特苗裔之人。內有認為親戚兄弟之土爾扈特八戶。將此八戶查出。交台吉等發回原游牧地方外。其餘額魯特已為嗣者。八十二戶之人。即以造入伊等正戶丁冊。與額魯特一體挑差。嗣後額魯特果無子嗣者。惟在本部落

挑取為嗣。其另外苗裔之人。不得擅自為嗣。○
嘉慶六年議准。八旗及外省駐防。有乏嗣應行
立繼者。如係長房長子。不准出繼。其長房次子。
次房長子。果係昭穆相當者。均准其出繼。僅長
房並無次子。此外近支亦無應繼之人。應以一
人承祀兩房宗祧。雖長房長子。准照獨子之例
出繼。○道光三年

諭嗣後有世襲旗人。如遇繼本族為嗣。方准其承襲世
職。其以另戶異姓親屬之人。過繼為嗣者。不准承襲。
著八旗都統等一體遵照。○同治九年。各准嗣後各

省駐防旗人繼嗣之案咨部即由部查明各該駐防送到該管官印結該族人甘結其與例相符者即行覈准一面行文該駐防一面知照該京旗儻該駐防旗人呈報不實別經發覺即將具結呈報之人照例懲辦仍將率行加結失察之該管官照例議處○又議准例無兼祧四房明文如係歿於王事者未便概令絕嗣應准兼祧四房

旗人買賣奴僕○

國初定旗下買賣人口赴各該旗市交易若越至

他旗市被執者。身價二分入官。一分給拏獲之人。○又定。滿洲壯丁。越旗賣出被首者。身價二分入官。一分給首告之人。買主無罪。該管佐領知情者。治罪。壯丁撤回。撥給本旗。不知情者。壯丁撤回。撥給本佐領下貧人。○又定。有將人父子兄弟夫婦分賣者。所賣之人均入官。○順治五年。覆准。投充人即係奴僕。願賣者聽。○十年題准。八旗買賣人口。均令該領催註冊備考。民人。令親鄰中證立契。赴本管衙門挂號鈐印。均免輸稅。如不註冊。無印契者。即治以私買私賣。

之罪。○十八年覆准。旗下赴市買賣人口。註冊時。該翼覈明。給予印照。○康熙二年題准。八旗買賣人口。兩家赴市。納稅註冊。令領催保結列名。若係漢人。令五城司坊官。驗有該管官印票准買。○八年題准。旗人買民為僕。令本管官用印。若隔屬官用印。照拏解良民例議處。所買之人。釋放為民。買者賣者。各責懲有差。○又議准。有將定例後所買之人。捏作定例前年月用印者。事發用印官及買者賣者。皆加等治罪。○十五年題准。旗下買民。令正印官用印准買。若在

地方犯罪逃出賣身者。保人係民人。枷三月杖一百。係旗人。枷三月鞭一百。原價追還給主。賣身人遞解本地方官。枷三月杖一百。仍照所犯罪依律究治。其旗人詭稱民人賣身者。枷三月鞭一百。保人係旗人。枷三月鞭一百。係民人。杖一百。流徙尚陽堡。若係逃人。照常鞭刺。○又定。賣身假捏籍貫姓名。不從實開寫者。枷兩月鞭一百。仍斷與買主。保人係旗人。枷一月鞭一百。係民人。枷一月杖一百。○十八年題准。凡旗人買僕。由用印衙門呈部。轉行督撫。令地方官曉

諭里甲。如用印官十日內。不將買人緣由報部者。罰俸一年。竟不報者。降一級。○二十二年議准。滿洲蒙古家人違禁賣與漢軍漢人者。買賣之人。係官。罰俸一年。係旗人。鞭一百。係民人。杖一百。如佐領內管領。驍騎校。及收稅官知情者。罰俸九月。領催。鞭八十。所買之人。並價皆入官。其喀爾喀額魯特人。亦不許漢軍漢人買用。違者。係官。降一級調用。係旗人。鞭一百。係民人。杖一百。所買之人入官。○五十二年議准。白契所買之人。若在買主家長大年久。養為義子。可以

當差者。今充步軍。○雍正元年覆准。白契賣身之人。經買主配與妻室者。不准贖身。若未經賣身之先。或已定親。未經完娶。賣身旗下。女家並不知情者。必問女家情願。方許配合。如女家不知情願者。聽其別嫁。○三年覆准。八旗滿洲蒙古家人開戶人等。間有嬾惰不能度日。串通原主賣身他家。賣後日久。又稱滿洲肆行勒索者。一經發覺。將原主一併議罪。並將冊籍撤回。給後買之人為奴。○四年覆准。吉林有民人願入旗為奴者。照京城例報知該地方官。給予印文。准

其買賣。○乾隆四年題准。奉天買賣人口。令兩
造該管官驗明文契。鈐蓋印信關防。准其註冊。

○三十七年

諭向來旗下家奴有酗酒行兇者。一經本主報明該旗
即行送部發遣。其妻室有年老殘廢。及不願隨帶者。
俱不同發。定例未為周密。不可不另立章程。以防流
弊。蓋家奴犯法。其妻亦屬有罪之人。自當一體發遣。
但此等罪犯妻室。自不值官為資送。若其中果有不
能隨帶者。或令於親屬依棲。或聽本婦另嫁。自不便
仍留服役。以杜嫌疑。嗣後該部旗遇有發遣家奴之

案。俱照此辦理。著為例。○四十一年議准。賞給功臣子孫家之罪人妻孥。應嚴加管束。如補授外任。及駐防外省。將所賞之人全行帶往。不得聽其留京散處滋事。違者嚴行治罪。○又議准。八旗官兵人等。買用奴僕。令其報明本管佐領。於契內鈐用關防。赴左右兩翼驗明。加給印照。歲底兩翼監督。將名口身價數目。造冊送部備查。不必由司坊官驗報。○又議准。各旗入官人口。變價。自十歲以上至六十歲。每口作價一十兩。六十一歲以上。每口五兩。九歲以下幼丁。按其年

幾歲作價幾兩。未滿周歲免其作價。○四十七年議准。織造鹽政稅務各監督衙門長隨。儻有心存怨望。不肯實心出力。有意債事。陷主於過者。該監督即就近交地方官衙門嚴加懲治。至長隨雖非契買家奴可比。但平時倚託衣食所資。即與奴僕無異。應將各衙門所收長隨。設有才具庸劣。不堪驅使者。止准該管官驅逐。其長隨等不得任意去留。以杜觀望之弊。儻有無故潛役他處者。照旗下逃奴之例。一律辦理。

出差官員駐防官兵買僕。○康熙八年

諭差遣官員並督撫提鎮大小各官。不許買良民為奴。及轉相餽送。永行禁飭。違者照略賣良民例治罪。○二十一年題准。直省駐防各官及提鎮以下等官。概不許買本省之民。違者降二級調用。若縱令家人買者。照本官買人例議處。該管官失察者。降一級留任。其駐防兵量許買人。令賣身人親至地方官處。取具親供存案。契內寫情願字樣。用印鈐蓋。若未經取親供文契。雖有情願字樣。實屬勒買者。買主枷一月。鞭一百。若本官囑兵丁買者。照本官買人例議處。如本主在京。其

家人在外駐防當兵者准買。如在外駐防官之家人當兵者不准買。○二十六年

諭駐防滿洲漢軍將軍以下官員兵丁。本省買人。如有不容行詢原籍。勒令地方官用印者。著該督撫指名題參。嚴加議處。○乾隆四十一年議准。駐防各官。不准收買本省民人為僕。如縱令家人私買。及囑託兵丁買者。照本官買人例議處。該管官失察。分別議處。其駐防兵丁。實在並無家人者。由該管官取結准買。仍不得過二名。若勒買及逾數者。治罪。該管官議處。○五十三年

諭地方遇有災祲無業貧民賣售子女原屬間有之事。此等貧民既因災歎口食無資不得已將其子女出賣。地方官果撫恤得宜無此等事。則善矣。若概行禁止。則災黎貧乏不能自存。又無以養贍其子女。必致歸於餓斃。豈軫惜災黎之道。自不若聽其賣鬻。則貧民既可得有身價。藉以存活。而其子女有人養育。亦不致於凍餒之患。豈非一舉兩得。又何必強為禁止耶。但民人子女或就近賣與地方民戶及過往客商。固所不禁。即各省赴京引見官員沿途價買攜帶亦尚屬可行。至如有新疆押解人犯及照料回子護送

哈薩克使人。並押送官物之官員人等。俱係由驛站行走。理宜簡便。若沿途買帶子女。則揀擇看視說合講價。既不免等候需時。而買定後沿途攜帶。又需多用車輛夫馬。必致擾累驛站。貽誤差使。且此等買帶子女之人。未必盡係自行買用。或為人代買。或復行販賣。更易滋別項情弊。而帶領來使之人。尤為外藩所笑。不可不嚴行查禁。嗣後著督撫等。遇有災祲地方貧民賣鬻子女者。除本地民戶過往客商。及並未馳驛官員。各聽其便。毋庸禁止外。其有派委差使由驛行走之人。俱應禁止。民人不得私行售賣。並隨時

查察此等官員。如有違禁私買攜帶者。即行嚴禁治罪。

口外買帶漢人。○順治六年題准。漢人不許帶出口外。如口外人有來

盛京購買馬匹。乘機買人口者。不准放出。○八年題准。朝鮮貢使。隱匿人口帶往者。鞭責。計日罰銀。若本地人隱匿逃往者。正法。

打牲壯丁及黑龍江官兵買僕。○雍正十二年議准。捕牲壯丁人等。解送貂皮來京。置買旗下奴僕者。令管轄前來之總管。副管。佐領。驍騎校。

領催等。並賣主之佐領驍騎校領催等。各具保結。在於左右兩翼稅契。其典買民人者。令總管等報明大宛二縣。將典買僕人姓名籍貫註冊。若黑龍江官兵來京。置買旗下奴僕者。取具同來官員保結。呈明本旗都統註冊。照例稅契。典買民人。亦照例報明大宛二縣註冊。違者僕人斷回。其買主照混買例治罪。管轄官叅處。若將所買之人。三年內得重價轉賣與人者。照略賣人口律治罪。該管各官。以失察例議處。

竈戶賣身○康熙三十九年題准。鹽竈戶賣身

旗下者。事發後。將賣身人。枷三月。杖一百。回原籍著役。引進保人。枷兩月。杖一百。仍行文該地方官。追取身價。交還原主。如不能償。著引進保人代償。

禁賣贖叛逆人犯。○康熙三年題准。已撥給山海關外叛逆人犯妻子家僕。有私行偷賣及贖去者。事發。係官革職。係民人。杖一百。流三千里。係旗人。枷兩月。鞭一百。專管各官。降二級調用。○七年覆准。私贖叛逆家屬。照例治罪。人口身價均入官。

投充人口○順治元年定。凡旗下漢人有父母兄弟妻子。情願入旗同居者。地方官給文赴部入冊。不許帶田地投充。○二年題准。近京地方管莊人等。強壓愚民及工匠勒令投充者。在內許赴戶部五城御史順天府在外。赴道府州縣告理。審實令歸原籍。○又題准。有假藉投充冒名奴僕。混託廝養。或悍奴欺壓故主。部民陵厲本官及慢侮搢紳。傾陷富室。占騙人口財物者。事發治以重罪。○三年題准。自次年為始。漢人投充旗下。永行禁止。○七年題准。投充人置買。

民間房地者。房地並價銀入官。買賣兩造。從重治罪。○八年

諭投充人有生事擾民者。本主及該佐領。如知情皆連坐。前此有司因責懲旗人。曾經問罪。以致投充人益加橫肆。嗣後地方官遇投充人有犯。與屬民一例究治。戶部刊示曉諭。○十七年題准。投充人誣稱不係投充者。審出。鞭一百。如果不係投充。欺壓良民者。亦鞭一百。○又題准。有將正戶人告稱係伊奴僕者。鞭八十。其投充人先未在地地方納糧。後將房地納糧。輒稱不係投充者。審明。枷一月。鞭

一百地方官混報者。以抗違論。經承杖八十。其民人住種旗人房地年久。告稱係自己房地者。杖八十。○又覆准各莊屯均設領催責成稽查。如旗人有指稱投充欺詐百姓者。解部究審。若屬假冒。地方官依律究擬。○康熙二年覆准。凡投充人父兄伯叔住居旗人房屋及種旗地。其子弟看守故土墳塋。或子弟住居旗人房屋及種旗地。其父兄伯叔看守故土墳塋者。行文地方官查其輸糧在先冊內載名者。即斷歸民。如投充後輸糧者。仍斷與旗人。○八年

諭投充人生事害民者。本主及該管佐領連坐。本犯正法。妻孥家產入官。罪不至死者。本犯及妻孥入官。嗣後地方有司遇投充人犯罪。與屬民一例責治。○十五年題准。嗣後有以投充旗下之人。稱為納糧之民者。地方官降一級調用。轉申之上司。罰俸一年。巡撫罰俸六月。先稱不係投充。後報投充者。地方官罰俸一年。該管上司罰俸六月。巡撫罰俸三月。○雍正三年議准。投充之人私自為民。後經發覺。將同族之人誣攀為同祖。或本主因家奴之同族稍有產業。誣告為投充之子孫。

者。審明將誣攀証告之人從重治罪。○乾隆二十五年奏准。直隸各屬附近京城旗民雜處。內有帶地投充之莊頭鷹戶。網戶人等。本身則為在檔旗人。其弟兄叔姪。又仍籍隸州縣。此等戶口。介在旗民之間。其與民人抗爭田地。輒以霸占旗產為詞。如其冒考民籍。又稱某支某派。本未入旗。緣伊等投充之時。或止本身。其後族姓多人。借名應差。過房養子。種種名色。互相容隱。漸至混淆不清。應令內務府。逐一清查。現檔內戶口。鈔冊一分。存部備查。一分。咨發該地方官。

備案。如有事故頂充之處。於比丁冊聲明報部。轉行該州縣註冊備查。至伊等弟兄叔姪。凡不在旗檔者。即屬民丁。應令地方官逐一清查。編入里甲。至下五旗包衣。或有似此投充莊頭。網戶。鷹戶等項。亦應清查。並令各該旗及直隸總督。如有介在旗民兩間之人。一例劃清辦理。○二十七年奏准。八旗滿洲蒙古漢軍都統。將現在屯居壯丁。開明旗分佐領名姓家口住址清冊咨送戶部。行文直隸總督。檄行各路理事同知。及有旗人居住之州縣。徹底清查。除現有守

堡屯目之地方。仍嚴飭管束外。如無守堡屯目之地方。即飭令該管官。於屯居旗人內。擇其老成能管束者。放為屯目。令其管束其鄉村窩遠單戶畸零之處。亦相度道里遠近。不必拘定旗分。交與附近之守堡屯目管轄。倘有不遵管束混行生事者。許該屯目稟明該管州縣。申詳理事同知。照例責處。仍造具屯目花名清冊。咨送八旗存查。如有更換。亦即隨時咨報存案。至屯居旗人有事來京。及往他處經營者。報明該管屯目。稟給限期。倘無故逗遛。以及潛往他處。即

嚴拏懲治。仍飭令該管官不時稽查。儻有屯目等藉端勒索等弊。亦即隨時究處。

出征俘獲人口。○順治五年覆准。俘獲人口。有將其父子兄弟夫婦分賣者。仍令給還完聚。賣主鞭責。○九年題准。陣獲人口。准其贖回。凡有贖人者。令嫡親家屬領歸。其身價兩家各取其半。○康熙三十年議准。出征所獲之人。有親戚情願來旗完聚者。不得作為奴僕。有願回本籍者聽。

違犯逃回。○同治五年

諭長善奏請清查旗籍並變通銷檔章程等語。山海關旗營。往往有逃回遣犯。仍在該旗營房暗地出入。圖迹潛伏。若不嚴行查拏。實為地方邊防之害。著長善嚴飭該管協領等隨時訪查。如有由配逃回及作姦犯科人犯。無論銷除旗檔。並在營房民居潛住者。一經查出。即行拏解。按律懲辦。並著隨案聲明。將該管官處分概予寬免。儻不認真查拏。知情故縱。或別經發覺。即將該管各官嚴參懲處。該旗之鄰佑親族人等。一併嚴行治罪。至銷除旗檔。安置旗人家屬各節。道光年間定例綦嚴。近來銷檔之案。並不認真覈辦。

以致有名無實。日久弊生。著刑部按照長善所陳變
通章程妥議具奏。